

沈忠敏公龜谿集

沈忠敏公龜谿集卷第九

啓

賀除留守啓

伏審賜環亟下信節遄歸飭燕館以留居御朝端而  
趣對身關國體想忘跋履之勞德享天心宜擁福釐  
之集恭惟某官朝廷碩輔社稷宗臣以臯夔之才逢  
堯舜之主引君當道蚤輸密勿之忠措世太平已底  
經綸之績勲銘具在紀律畢張聿從真館之游乃託  
介藩之任申伯之居南國雖賴蕃宣周公之詠東山

終還左右及此介圭之覲實符仄席之求諒展辰猶  
數膺晝接然以素望之所屬必惟舊人之是圖竝秉  
國均轉洪鈞之一氣益熙帝載平泰階之六符載念  
微生嘗叨異顧與燕雀而同賀庶桃李之垂陰

問候中書啓

伏念某猥以微生叨從末宦效九九之技曩若江湖  
之濱瞻兩兩之符恍然雲漢之表顧門牆之彌峻致  
竿牘之罕通引領云勞傾心則壹恭惟謀謨帝所勸  
相王家順迎六氣之和茂擁三靈之祐伏以某官夙

鍾間氣親際昌辰遂以非常之才助成無競之烈發  
揮一德使邦朋之寢消感槩百爲由國是之先定及  
此精神之會應於寤寐之求天睠孔昭民瞻允屬據  
百寮之上已知體貌之崇居三事之先卽俟儀形之  
正上以副一人之意下以慰四海之心更乞深念宗  
祊加護寢餼某卑情無任祝頌虔切之至

賀漕使加職啓

伏審顯膺徽數寵進崇資凡託庇庥舉深欣屬恭以  
某官存心甚遠養氣至剛亮節端誠實表儀於當世



危言鯁論皆根本於生民不圖近功可贊大事憤愚  
民之昷昧連狡寇之猖狂爰飭使軺式嚴師律九攻  
九拒多自於指蹤萬舉萬全豈容其假息至於轉餉  
曾不乏供果消南顧之憂遂躡西清之秩策勲方茂  
第賞惟新觀賜札之系傳知召環之狎至退惟陋質  
叨沐餘光承命之初爲喜益倍

謝薦舉啓

課功無狀偶逃大吏之譴何進秩有階忽冒上臣之  
薦籍過形褻字加賁沈蹤顧寒責之靡遑唯銜恩而

獨至竊以聖人以學而成俗是爲教化之原儒者以道而得民非若簿書之比故於州縣之職莫先庠序之聯雖列處侯邦第使視曹於幕府而選從帝學更令通籍於橋門至煩一代之宗師並舉四方之寒畯號曰吾屬收爲已知然而泮水泛居或類河中之木需章典奏必蒐席上之珍宜得魁壘軒昂之才加以䟽通該洽之識名實四達言行兩純使之無遺庶云有補如其者天資昏惰人品羈單少也讀書徒粗知於爲已長而干祿蓋苟求於及親以應俗多老生之

常談而經世之古人之大節長恐沒齒分爲散材乃  
霑黃甲之恩漸免白丁之役及補郡吏復居校官設  
施皆熟於平時游處旣多於暇日稍尋黃巷轉授青  
衿必有我師雖欲從其善者此非子座豈待請而避  
之跡未至於顛躋心已慚於忝冒方期斥去遽辱名  
聞此蓋伏遇某官提衡九流推轂多士小德役大德  
每蹈孟軻之言先知覺後知將成伊尹之志遂以丹  
霄之定價勉茲白社之寒生不間庸愚亦加采錄顧  
矜憐之若此嘆報效之云何某敢不增所未長鞭其

不及駑馬十駕庶申伏櫪之悲敝帚千金終發掃門之喜

謝運使差權知縣事啓

恭承郵報俾攝縣章調宓令之琴馬知政理擁毛生之檄聊遂親謀蒙幸有餘包羞無所伏念其欽欽可笑約結亡奇懵學難成顧短檠而自媿薄游寡偶撫長鋏以誰憐栖遲太學之十年竊取奉常之一第尚須官次伏處鄉邦誰是餽漿之人空餘乞米之帖茲因弭節方獲曳裾擢於田里之中寘在門墻之末公

移遠逮就假一雷之封疾置驚傳親著五雲之字顧  
惟凡瑣乃爾遭逢此蓋某官遠業濟時高風勵俗裕  
民足國已操邦計之羸謫德量能更欲人材之當故  
令散吏輒補曠官某敢不勉盡所長以待乃事體一  
日葺居之戒寧憚小勞臻五月報政之期庶收微效  
奉天 問候運使啓

嚮自揚舲督府引棘行臺濫從俎豆之間數奉珪璋  
之表竭來敝邑阻拜前塵緬惟規略之餘休有神明  
之相恭以某官望隆當世行配古人才地有餘雖多

多而倚辦辭源無極猶憂憂以知難言皆合於上心  
動必關於國體暫屈經綸之手遂恢富足之原言聽  
計行實逢千載之會家給人足更邁九年之儲柄用  
可期師瞻已峻更乞上爲宗祐加護寢興其下情無  
任祈嚮依歸之至

新令遠迎狀

伏審某官比膺芝綍屈領銅章調宓令之琴行觀美  
政整王喬之舄共仰仙風退念飄蓬之餘空懷揚糝  
之懼承顏之幸翹足以須

賀毛給事啓

伏審溫綸亟下大旆遙歸騰聞四方聳動群聽竊以  
殿中獻納之地是爲門下論駁之司非風節梗槩則  
不足以典樞機非論議該通則不足以承顧問故楊  
雄於漢擢先待詔之聯而李藩在唐望隆批勅之手  
得人如此視古庶幾恭惟某官學爲儒宗才配人傑  
持心耿介壓嵩岱而不移蘊量恢闔包滄溟而無際  
炳文章之光焰極師友之淵源名蓋一時用先諸老  
徐堅真舍人樣蚤擅中朝望之實宰相才聊從外補

席方及煖政已報成紫泥俄見於賜環青瑣復叅於  
持橐想金甌之久覆指玉鉉以旋登公論所期斯言  
可必其繆從末路景仰英風茲聞明命之頒彌激懦  
衷之喜榆枋斥鷃敢知鵬運之高庭戶飛蠅但欲驥  
程之遠依歸抃躍倍百等倫

賀賈舍人啓

伏審茂膺詔檢寵進詞垣聯侍從之榮班極文章之  
盛選育騰疾置光動故鄉恭以某官學配古人才高  
當世早馳妙譽擅滄海之遺珠獨冠賢科應崑山之



片玉用先諸老擢自一人校讎兼六籍之微刊正盡  
群言之失踐揚滋久問望益隆進直螭坳記載之功  
唯允首陪鷄戟調護之德攸全爰從禮樂之司入掌  
絲綸之地舍人樣有如此大手筆無甚難紅藥裁詩  
暢中和之遠韻紫微草詔追顯噩之醇風紹蘇賈之  
才名超伊管之相業乃符輿論亦出家聲某蹤跡陸  
沉音塵斗曠側聞成命之出彌增未契之榮目想俊  
游輒起彈冠之興心懷美蔭尤傾賀履之誠

謝改差常州學官啓

問塗湘水方懷陟屺之思易地蘭陵復預采芹之樂  
幸旣安於子職喜遂發於親顏揣分云優循涯以愧  
伏念某天資禱昧人品羈單妄刻意於詩書旋躡蹤  
於衿佩一隨計牒九換年華菘韭春秋屢動故園之  
興齋鹽朝暮貪觀上國之光偶脫白丁遽聯黃甲洎  
親榮三釜之祿飾身叨五兩之綸謂寸進之可期宜  
分陰之亦競而乃赴銓十月補吏一涯取道重江念  
毛生之檄徒捧待期荐歲顧墨子之突未黔敢圖小  
物之私曲綴大賢之念達籲天之危悃遂擇地之初

心訖使便安盡從願欲茲蓋其官恩深教載德懋燮  
調推大鈞之無垠衆由平進謂小人之有母獨軫深  
慈便菽水之奉於近鄉脫風波之危於遠役矜憐若  
此報稱云何某敢不激昂其衷砥礪所學庭聞愛日  
已寬 暮之懷庠序承風益廣朋游之樂

賀馮承旨啓

伏審鋒車入覲斧戾對揚超玉筍之新班冠金鑾之  
舊直除音四出歡頌一詞竊以舉三代之遺英而當  
號令文章之事取四海之雋望而揔言語侍從之官

此上所以篤於近臣而世亦將期以大用况夫親承  
密旨獨望清光地接六符之中階秩高兩禁之上列  
帝選于衆公惟其人恭惟某官炳嶽瀆之靈盡東南  
之美德量蓋存夫遠大道術已造於純全氣壘九州  
繇直養而無害才周萬事殆曲成而不遺忠既格於  
天淵信亦行於蠻貊晝膺三接歲閱九遷詞掖代言  
思若湧泉之决儒官正席化如時雨之施騰聞東序  
之絃歌歸聽北扉之鈴索方將攄尊主庇民之術豈  
特煥經天緯地之文遽銜恤於倚廬致興思於仄席

聿頒召節仍趣賜環天子虛懷安問鬼神之所以都  
人拭目復觀風采之凜然迨出親除式昭異數定見  
金甌之覆卽期玉鉉之登德裕之文用雖長於大手  
吉甫旣相禮自絕於同僚斯言不誣惟日以俟其離  
奇蒨質么麼微生頃蒙特達之知曾乏先容之助側  
聞顯渥倍激驩悰久託範模行費大鈞之塊北僅同  
燕雀更欣夏屋之幬幪

賀新守威學士啓

伏審細札疏恩左符分命起自列僊之館來臨多士

之鄉芹藻生輝布韋增氣恭以其官剛明蓄德端厚  
凝姿粲然星斗之文粹矣珪璋之表賢關闊步早收  
俊造之科仕路橫翔遂入英雄之

光堯  
嫌名

乘輅擅膚使

之譽列棘聳名卿之稱醞藉有餘於風流綠飾無先

於儒雅一昨辭榮北闕均逸南州田里絕歎息之聲

治功藹著庠序修孝弟之義名教勃興集此美談發

於遺愛况蘭陵之孔道接茗水之上游喬木相望稔

服善鄰之教令甘棠具在飮聞雅俗之歌謠用是此

邦絃誦之徒思見我公色笑之樂茲聞除目實激懽

不  
九  
九  
棕顧惟齋鹽之冷官曾是門闌之下客燕雀相賀同  
看大厦之蔭成桃李方華獨認舊蹊之路穩依歸并  
躍倍萬等倫

賀盧左司啓

伏審祗承嚴召亟被峻除顯陟中臺之端榮居上宰  
之屬音騰郵置驩動搢紳竊以尚書會萬事之本元  
左司貳六曹之綱轄所以抗議軒陛叅謀廟堂因唐  
建官始重都公之號迨宋稽古實爲法從之儲惟御名  
東求豈輕除授恭以某官氣壓萬象心潛九流本師

友之淵源發文章之光焰出符國瑞同威鳳之九苞  
居協地靈配元龜之五摠爰自早歲竭來上都勃馬  
起三俊之名凜然歸四海之望既橫翔於雄

光堯  
御名遂

獨步於英躔絳帳談經咸忘鼎來之學赤裳賦命遽

詠遄歸之詩方追臺妙之游復領使華之寄雖登車

之志遠念側席之恩深是宜趣還庸副虛佇欲知相

業試觀省闈之彌綸行慶帝俞卽步禁塗之清切自

顧門闌之下客曾塵衡石之上游寅緣蕪辭竊取英

眄喜樂正之好善亦既有爲謂公叔之爲文豈能無



望

賀毛顯謨知鎮江府啓

伏審某官懇辭清禁榮統要藩嚴助懷歸本厭承明  
之直蕭傅復出蓋觀宰相之材唯其被寵光而益新  
所以全譽處而彌固有識相慶不謀同詞恭以某官  
望重吏師學深王佐秋陽江漢會道術於環中景星  
鳳凰聳德名於天下勁氣發後凋之操沈謀迎先見  
之幾忠無他腸才有餘地視文章之小技素所優爲  
舉節義之大閑方將獨立笑曲士之未徧爲賢者之

不能故於用舍重輕之間以見進退難易之際抗章  
避寵奏屢卻而復前褒詔賜俞意重違而愈厚訖從  
荷橐爰假竹符峻秘職於西清委良翰於南國明哲  
具美旣歌山甫之遄歸治行騰聞卽慶菑翁之大用  
某承顏雖晚受顧則深初聆警欵之音已荷齒牙之  
論竊冒叢雲之蔭更許包蒙默希霖雨之恩終期振

稿

賀正啓

月窮于紀方占嗣歲之祥星回于天遂履初元之吉

維世巨哲實享純釐恭惟某官正色立朝虛已游世  
功名自致早親日月之光節義獨高更勵冰霜之操  
對越三陽之序導迎六氣之和卽擁春祺入熙帝載  
某逃違恩闕阻奉壽觴瞻頌惟勤名言曷喻

同前

上同維時舊弼實享繁釐恭惟某官道濟寰區功存  
廟社陶鈞獨運早陪黃閣之游鼎鼐再調終慰蒼生  
之望對越三陽之序導迎六氣之和卽擁春祺入扶  
帝祚某踰回末路坐遠崇闕阻稱椒柏之觴遙薦松

椿之壽瞻祈是切敷叙曷周

謝祭酒舉改官啓

飛章帝所推華袞一字之褒傳檄儒官增弊帚千金  
之享載惟忝冒采積驚慚竊以知人之道固難而儒  
術非他技之比入仕之流寢廣而學校乃公議所歸  
至於宗師之薦論必繫朝廷之柬拔秩六百石徑脫  
州縣之冗曹歲四十員盡收雍泮之清選專以蒐羅  
一時寒畯之士因以激昂三代豪傑之風凡舉所知  
必從其類故竽牘小夫之智至無所容簿書俗吏之

爲略而弗取自非文章炳蔚問學淹通望實有加於  
人行能無媿於古則何以酬丹霄之定價附青雲以  
垂名如某者藝晚寒茲辭源淺派所學真土梗耳弗  
造本根於道猶醢鷄歟未離幽部頃聯黃甲偶代白  
丁旣預搢紳之游卽分庠序之教歎齏鹽於朝暮寧  
逃獨冷之譏閱絃誦於春秋粗知三樂之趣技殫廳  
鼠化止奔蜂方幽黜之是虞曷明揚之遽及平生慕  
願此日遭逢茲蓋某官推輓九流括囊六藝自任斯  
文之興廢獨爲吾道之重輕先知覺後知於身親見

小德役大德與時偕行乃矐微蹤嘗叨異眄終未忘  
於下體遂不壅於上聞芹藻預榮蓬華增氣某敢不  
恪遵師法御名守官箴節勵冰霜必欲免夏畦之病光  
分螢爝或能助秋陽之明

謝將廸功啓

伏審首被貢書遂偕計牒膠庠倚重黨友增華貢元  
某官杞梓奇材芝蘭秀質藉甚家聲之振藹然世德  
之昌黃卷一經得賢父兄之樂青衫九品從貴子弟  
之游初接迹於群居已程能於異等迨膺妙選實愜

衆情縱步武於夷塗可立待也收功名於絕會是以  
似之方深贊喜之誠繆辱飛文之貺銘藏惟切敷述  
奚殫

賀盧舍人啓

伏審近膺制檢遂陟詞垣入陪清禁之塗允屬鴻儒  
之任權輿廊廟鼓舞搢紳共以某官如唐一夔爲宋  
三儁講奪重席蓋國中之真儒談傾四筵亦天下之  
辯士文章有古之風烈德行爲時之表儀素望藹然  
英聲籍甚上所屬意見謂有宰相才民亦系心何止

爲舍人樣茲假判花之重呂叅視草之榮政事預聞  
允資國體之通達訓詞具在共期帝制之坦明洪惟  
二者之長信謂一時之美方將日膺三接歲閱九遷  
亟躋玉筍之班卽進金鑾之直斯言可必指日以期  
某受恩特深爲喜益倍燕雀相賀初瞻大厦之蔭成  
桃李不言自識舊蹊之路穩

賀周司業啓

伏審被恩宸扆正位學官凡在下風孰不同慶恭以  
某官自天仙伯爲世儒宗學貫九流獨腕拘攣之見



石龜齋集卷九  
十四  
文備衆體雅好深湛之思論不詭於聖人達可行之  
天下確乎不拔暗然而章鐵心石腸素蘊功名之志  
金口木舌豈唯誦說之才選自郎闈登此師帳誠恐  
明綸之出不煩重席之溫趣據要津庸副清議某伏  
自早歲卽聞大名因緣夔下之棄材出入光堯中之  
餘地蹉跎一命契濶七年身繫寒鄉徒有修門之夢  
心懷美蔭莫陪廣廈之游

賀林資政除南京啓

側聞休命就起宗工還祕殿之崇資委陪京之重寄

恩言誕布僉論文孚恭以某官受天全材爲帝良弼  
韜文武之兩器秉忠孝之一心氣貫堪輿繇直養而  
無害智窮耿忽皆曲成而不遺勲名具存風采可想  
雖讒波之橫起而天鑒之孔昭曾無淹時遽有徽數  
欲付倚平之任姑煩釐尹之行塊北大鈞行歸浴鳳  
之治鬱葱佳氣况隣飛鷁之都定觀麻檢之頒卽對  
袞衣之寵多士之願斯民所同某受知特深爲喜益  
倍屬吏曹之有守趨賓列以無階

謝薦舉格

黷舍室餐久竊養賢之鼎輪軒過聽誤登薦士之書  
自顧何堪人以為幸竊以汲引之重今古所同取夫  
拔茅宜在泰通之世譬之推轂當遵平陸之塗豈唯  
卿士之舉能抑亦王公之借舉不在此族則為匪人  
而况摠一道之詢謀會列城之殿最按廉既廣簡核  
惟精必得異才乃副公舉如某者江湖漫仕蓬葦寒  
生斷斷他技之猗無錄錄奇節之未有短檠徒對口  
耳之學易窮長缺空彈齒牙之論安在詎意車中之  
半面尚矜堂下之一言略其迂愚賜之翦拂此蓋某

官識先致遠量極包蒙事君以人自得上臣之體與人爲善獨高君子之風兼收尺寸之長靡有錙銖之失推其餘地庇此微蹤某敢不力跂前修誓圖後效俯稱鄉人之好仰酬國士之知

賀毛顯謨除真定帥啓

伏審近奉帝綸就更戎幄輟西清之密侍紆北顧之深憂先聲所馳群醜攸讐恭以某官公輔之望蓋自少時將帥之才乃其餘事徒以詩書之府形爲文武之韜凜然堂上之奇兵威加草木遂矣幕中之婉畫

名動蠻夷暫分清禁之光以壯朔方之勢然而癘爲  
一面之病骨乃四支之彊賢人入朝黠虜何筭果吾  
父也尊俎可以銷萌以我公今鼎鉉待而增重行因  
入覲遂卽登庸某早伏下風近叨殊眄許其氣類之  
比借以品題之私望元戎之啓行心隨目斷嗟太史  
之留滯力與命違

賀盧給事啓

伏審比繇西省進直東臺帝恩所加士論增重竊以  
凡號法從均游禁塗獨於青瑣之崇資叅用黃門之

故事辯駁邪正彈訶同烏府之嚴論議古今顧問亞  
貂冠之峻欲稱是職必惟其人恭以其官如古天民  
爲時人傑學洞九流之邃文追六籍之醇宇韻獨高  
忠忱素著如璞玉渾金而莫能名其器於盤根錯節  
而有以見其才神具聽其靖共世固知其久大果膺  
殊賧遂陟近班職在掌綸已擅舍人之樣任當批勅  
更繼夕郎之風固非一日而得君是宜旬月而取相  
行聞大用實副僉言其繆荷深知本緣末技側聽鵬  
搏之迅彌增蠅附之榮抃躍依歸倍萬倫等

賀黃司成啓

伏審近膺帝制遂正儒宗多士聳觀豈特膠庠之矜  
式四方同慶茲爲廊廟之權輿凡託恩庥共深欣屬  
恭惟某官望隆王佐名重世師德行配先民之純文  
章祛後學之弊取武城二三策雅謂知言得商頌十  
二篇蚤推能賦恢然凝遠之度邃矣深湛之思有往  
皆成無施不可上所注意尤知山甫之小心民皆具  
瞻已必芻翁之大用果叅法從進直掖垣亟由鳳閣  
之近班來處鱣堂之故地回瞻僚吏盡四海之淵源

追數遊從信一時之豪傑斯文有託吾道益尊木鐸  
之任既優金鉉之除伊邇進北扉而承密旨綽有前  
規開東閣而館翹材佇觀殊渥某寅緣姻婭出入門  
闈自跼迹於末塗阻承顏於隅坐側聆休命倍激懽  
悰

賀湖守葛待制啓

比審高牙已臨大府寬條一出驩頌四馳恭以其官  
心存古人氣蓋當世名號一時之豪傑學爲四海之  
宗師兩禁同游最先德舉八科金中豈止文鳴上心



雅欲其居中時論久嗟於補外然公卿皆憚徒以君  
嚴之立朝而吏民不欺亦賴長公之治郡遂請使安  
之地用蘇疲瘵之氓正恐賜環不容煥席某頃由絃  
誦獲進門牆服在下陳方執簿書之役瞻言故國莫  
修桑梓之恭依嚮之誠倍萬常品

賀盛守再任啓

伏審祇奉新恩荐臨舊治提封所暨驩頌如初恭以  
某官卓犖受才洪深廸德道義滿於天下英雄游於  
光堯中煥星斗之文追古作者起雷霆之譽爲時聞  
嫌名

人功有爲以皆成治無施而不可輟從棘寺出領竹  
符千里興謠坐見流亡之復暮年報政騰聞課最之  
優妙達睿聰併崇徽數稍緩韓侯之入覲姑狗寇恂  
之借留善政流風民自安於教令深謀至計帝亦俟  
于咨詢會有追鋒不容暖席顧惟踈賤叨辱知憐方  
懷勿翦之思更勵必恭之戒依歸下悃倍百常情

沈忠敏公龜谿集卷第九終



沈忠敏公龜谿集卷第十

啓狀附

謝運使胡修撰舉改官啓

浮沈州縣甘老簿書出入門墻誤緣翰墨更借板援  
之勢遂成汲引之恩投足知歸撫心懷感伏念某江  
湖一介塵土半生叔夜粗疎顧豈堪於作吏次山浪  
漫蓋已懶於爲官未能成洗耳之圖不免效折腰之  
態庸庸備位職號馬曹累累隨行事同牛走念是非  
之相亂致力命之兩疑借曰自媒正使誰譽比因修



小記室之問乃得望大君子之光矚所加過爲衆中之異聽聞或誤遽忘名下之虛公賜品題曲爲道地意極丘山之重言逾布帛之溫退省空踈豈能稱塞茲蓋伏遇某官權衡一世水鏡九流發爲月旦之評動合春秋之法獎帚無用提携遂享於千金駑馬有知鞭策更勤於十駕不忘委瑣亦玷揄揚某敢不欽誦格言勉圖薄效許以操修加御名當遵節義之大閑謂其學問過優敢銜文章之小技庶幾激勵毋辱

知憐

公爲集卷之十

卷之十

卷之十

卷之十

賀年啓

星回嗣歲月旅上春適三陽之類升宜五福之交會  
恭惟某官政先平易德懋中和徧歷劇煩渙若凝冰  
之釋一蘇疲瘵煖然挾纊之溫對越令辰受時純嘏  
遂被疇咨之命式登光輔之聯某心系門牆身迷州  
縣舉賀觴而莫及削慶牘以徒勤

謝秀守苗郎中舉改官啓

二紀服儒猶念呻吟之舊一官書獄豈堪流落之餘  
遽辱提撕重爲榮耀伏念某受生多難涉世少徒偶

從鍾繡之謀輒污軒裳之列銜玉賈石夫豈本心乞  
酒得漿亦其定分亟捨絃歌之樂驟親敲扑之煩群  
言譎譎爭沮幕中之辯獨行踽踽敢矜席上之珍乃  
使挂需頭之章終免爲搖尾之態靜言特達重愧空  
踈此蓋伏遇某官隱德在時深忠許國牧人馭衆共  
師循吏之風流推賢與能自得上臣之識度優容寒  
素曲賜獎成某敢不銘肌感恩刻意爲善庸庸末學  
儻有見於施爲斷斷餘生庶無忘於報稱

謝運使王待制舉改官啓

三語就掾亟從莫府之趨一字興褒輒累公車之薦  
荷恩已過揣分奚勝伏念其漢落散材嬰跼蹇足貧  
交易厭揖窮鬼而告行拙迹難安拜天孫而請禱念

兩求之皆失歎百慮之相攻髮已星星心徒炯炯一  
昨汰從黷舍還綴銓曹路隔九霄豈有修門之夢家  
存四壁未成下澤之游挫針資餬口之謀束帶效折  
腰之役當塗知己或似寒蟬末路依人空慚社燕幸

光堯  
嫌名

褰帷之始喜形傾蓋之餘召置門墻使操翰墨

然員多闕少時方會於省官而親老家貧勢固難於



擇祿竭來書獄聊以代耕蓋由剡列之私旣適便安  
之願更煩汲引彌見矜憐此蓋伏遇某官盛德容愚  
通才應變以成室屋兼收椳闌居楔之微可羞王公  
近采蘋蘩瀘藻之賤故雖沈於下列亦不壅於上聞  
加惠寒生增榮孤宦某敢不希蹤先列抗志後陳抱  
槩磨鈇期不易儒者之事飲冰食蘖庶無負門下之  
知

賀提刑啓

伏審奉承溫詔臨按祥刑瞻擁傳之星馳知屬城之

風靡餘光所屬驩意已孚恭惟某官蘊識疏明懷才  
敏達溢爲政事曾不愧於古人著在謀謨皆可行之  
天下及被承顏之寵遂紆造膝之私親被上恩就更  
使命威聲所徹但聞草木之知氛祲一消無復狐狸  
之間恐未遑於煖席遂已趣於賜環退省孤蹤獲歸  
餘芘萬事不理行賴於多聞六轡旣均庶陪於後列  
欣榮之至敷叙曷周

賀沈狀元啓

伏審奉大庭之對擢居多士之先隲秘府之書進列

群仙之右寵踰疇昔聲振縣區恭惟驩慶竊以國家  
數路設科三歲下詔豈特循祖宗之法蓋將收豪傑  
之才紛然朋來至以萬計蔚爲首選固多異人曾未  
有夢兆一飛恩加再見家聲踵復襲兩世之青氊宸  
藻親褰煥九天之丹檢付以圖書之職示爲翰墨之  
儲名雖先登事豈前比伏惟某官文備衆體學總百  
家節槩軒昂鬱鬱棟梁之氣見聞淹洽滔滔江漢之  
流蚤也從四方之游固已擅一時之譽揭來文陛獨  
冠英躔上興見晚之嗟士有先覩之快蓬山芸閣之

直何足道哉金鑾玉堂之除可立待也某沉迷簿領  
荏苒歲時未敢勝書輕為贊喜之禮乃蒙削牘曲致  
撫謙之詞媿感既深名言罔旣

賀左丞啓

伏審天綽䟽恩台躔進次正泰階六符之象冠文昌  
八座之聯成命下傳善類相慶恭惟某官三代豪傑  
一時宗師夙懷經濟之圖深達彌綸之體晉公德望  
孰不問年齡之幾何賈傅才名豈止對鬼神之所以  
智略輻奏風采想聞自登政席之崇彌見勳盟之著

九夷通道綽有成功三后協心舉無異議乃就升於  
左轄以增重於中臺帝眷旣隆臣隣益峻某登門最  
舊受顧已深聞天上之除音殆將起舞記日邊之歸  
路正復坐馳抃躍之私輸寫難盡

賀張狀元啓

伏以法駕親巡不廢詳延之問紛袍族議已推絕類  
之才乃下臚傳果先科列伏惟慶慰恭以某官躬行  
篤實資稟魁閎久於湮淪獨高鄉曲之譽素所蓄積  
綽有廊廟之謀一朝遂冠於英豪諸老盡驚其剴切

莫可尚已夫豈偶然  
主上痛悼往圖渴聞至論

以爲飲食嘗膽之日必有慟哭流涕之言特下詔育

專求讜直禦戎三策殆興見晚之嗟寤主一言孰先

御名獨之戒方將摠發舊學踐履亨塗庶幾寫平生憂

國之心何止爲今日決科之具屬茲晚歲竊伏下風

未遑柔翰之修先辱珍函之貺感銘丹臆倍蕪常情

賀凌先輩啓

伏審奉承大對擢置上科拜命赤墀猶亞一龍之首

題名翠琰遂居千佛之先用吉士乃邦家之光納讜

言真社稷之福未遑馳問遽辱飛牋感愧之深敷宣罔既

謝黃子虛學士啓

伏審比膺詔旨追寵諫章黨石刊名忠節凜於當代書林進秩恩光溢於暮年幽憤既申勝流相慶伏惟某官仁言利溥義勇氣充蓋萬折而必東雖三已而無愠白日一照伯魚何辯於前誣高風四馳叔向自全於遺直時方捩於變亂上益思於典刑佇聞追鋒來副仄席眷言宦學久預交游邂逅公朝舉揚正論

喜極阻修於柔翰謙馮亟貺於珍函感愧之深名言  
罔旣

謝曾顯謨啓

比者徧塵三院久污紀綱之思進總一臺忽玷絲綸  
之命莫遂循牆之避更增據疾之憂曷寵益深負慙  
彌重上意開納知犯顏逆指之非難國步阡危念疾  
首痛心而何補敢謂隆謙之眷過形褒大之詞披繹  
再三驚慚倍百此益某官多聞守約汎愛親仁緇衣  
好賢之誠德配先正青箱傳世之學名滿諸儒特煩



揮翰之懃加賁登門之舊規存麗藻感發懦衷銘鏤  
之私敷陳曷旣

賀趙叅政啓

伏審進登舊弼叅總繁機命下九天驩騰萬宇竊惟  
自古禍亂之國必生希世豪傑之才因時作興與民  
休息臨巨川而未濟方俟舟航扶大厦之將傾必資  
柱石副上此意非公而誰伏惟某官誠格天淵忠存  
廟社方嚴足以斷大事靜重足以經遠猷直道而行  
獨立不懼蹇蹇王臣之節更變故而彌堅赫赫師尹

之瞻遭讒邪而益著擠之劇地凜然威名是致未央  
興夜半之思長安指日邊之路迨膺出綽不俟解鞍  
見管夷吾誰復效楚囚之泣用范武子自然知晉盜  
之奔爭覩設施預期戡定豈特疲氓之引領是爲善  
類之傾心矧此孤蹤嘗叨異盼方念一麾而去國未  
能三賀以登門抃躍私誠倍萬常品謝林廷賢恩之

知鎮江與戶部姚侍郎先狀

比者誤膺明命寵付便藩顧衰病之無庸豈堪煩劇  
賴知憐之有素遂託庇存卽獲參承倍增欣抃

知鎮江通用謝狀

比者忽膺明命寵付便藩收跡山林之間方圖屏仗  
從事干戈之際豈克堪任揣分知難曷榮爲懼此蓋  
某官推心忠厚廸行端良借餘論以嘘枯致誤恩之  
起廢更蒙珍翰用賁孤蹤感媿之私敷陳罔既  
知鎮江與韓帥先狀

比者誤膺明命寵付便藩久伏山林之間豈堪煩劇  
仰託節旄之下庶獲庇存屬鞬將謁於轅門削牘敢  
塵於記室依歸之素敷叙曷殫

知鎮江回人賀啓

比者忽膺明命寵付便藩收跡林泉之間方圖屏伏  
從事干戈之際豈克堪任揣分知難冒榮爲懼此蓋  
某官壯猷排難雅量包荒借餘論以嘘枯致誤恩之  
起廢江山如故方從仁里之游雉堞相望更託善鄰  
之庇特貽珍翰益賁孤蹤

知鎮江府到任謝宰執啓

起之間館付以名城井邑丘墟未變創殘之俗江山  
襟帶猶爲形勝之區宿師方折於遐衝謀帥乃推於

庸品才雖靡稱恩則有歸此蓋伏遇某官柱石邦圖  
著龜國論以一夫不獲為重任以四方未靖為深憂  
雅量鎮浮屹立中朝之望元功定難力摧外敵之鋒  
蓋將扶大厦之顛故盡掩群材之短遂令駑鈍亦累  
埏鎔既奔命以之官庶收功而塞責然某衰羸多病  
編急少思方當調發之煩未免催科之拙願寬銜勒  
覬脫簡書不失朝廷勞來之方是為門闌收錄之報

問候劉帥啓

印紱相承猶接典刑之舊旌旗旁列遂依節制之雄

嚮風每跂於前塵蒙霧自霑於餘潤願修竿牘少罄  
情棕伏惟某官韜略承家勲庸許國威望聳傳於四  
裔忠誠簡在於九重行總全師往清方夏平時外敵  
素知李廣之無雙卽日中興必倚汾陽爲第一是爲  
社稷之衛宜擁神靈之休更冀妙嗇天和允荅人望  
邇詠之切敷叙曷殫

除尚書回人賀啓

起領州麾未聞治狀趨還朝著忽拜召音仰蒙簡記  
之恩俯念衰羸之質輒嘗引疾庶欲投閒成命莫回

預積曠瘼之懼移書遽及過形褒借之私感愧之深  
敷宣罔既

回孟叅政啓

羽檄上聞驚犬羊之入寇鑾輿順動總貔虎以親征  
宸謨悉出於萬全士氣殆逾於百倍符堅之扣淝水  
聊與周旋佛狸之歿卯羊必期犇潰迨其卻走舉協  
初謀此蓋某官識際天人心存社稷叅籌帷之秘資  
經遠之壯圖總留鑰之嚴倚居中之夙望致敵鋒之  
屢挫知國步之永安某猥以微才濫叨近列負囊鞬

而扈趕奉引何功擁被篲以造門趨承甚邇餘寒在  
候珍嗇是祈

謝席叅政啓

比者叨奉制綸擢陪政路屬四郊多壘之際贊一日  
萬幾之煩薄技奚施嘗循牆而避命俞音旣嗇終據  
疾以拜恩繇力弗勝覩顏安寄此蓋某官宅心忠恕  
迪德謙虛延譽當朝每託吹噓之末論交晚歲更親  
矩矱之餘遂致微蹤遽膺重任辱賀緘之彌渥攄感  
臆以徒深銘鏤之私敷陳曷旣



謝前宰執啓

比者叨奉制綸擢陪政路屬四郊多壘之際贊一日  
萬幾之繁薄技奚施嘗循牆而瀝懇俞音旣嗇終據  
蒞以拜恩伏念某學昧通方才踈適變偶以片言之  
合驟蒙上聖之知念人物之耿然誰不如己處廊廟  
則駭矣人其謂何汗號莫回覲顏安寄茲蓋伏遇某  
官柱石王室股肱帝躬宏濟艱難務兼收於群策旁  
招俊乂圖僉輯於庶功貌是孤蹤越從下列卽託埏  
鎔之末親聞矩矱之餘訖致妄庸誤膺光寵中存丹

赤徒知當勉於夙宵外竭罷駑誠恐莫裨於塵露感  
銘之切敷叙曷周

謝劉宣撫啓

竊以羽檄四馳遽音日至天戈一指醜類宵奔成宗  
社莫大之勲振朝廷久衰之氣威行塞外驩動區中  
伏惟某官躬受傑才世資雄略吳漢若一敵國屢挫  
犬羊之鋒嫖姚比再冠軍益整貔貅之旅屬茲逆寇  
挾彼援師深入兩淮之間相持三月之久仰繫勝筭  
盡伐狡謀曾無亡矢遺鏃之虞每有折馘執俘之捷

符堅之扣淝水聊與周旋佛狸之歿卯年果聞潛遁  
顧外敵之已卻諒中興之所基草木類人旌旗動色  
功存萬世方將固山河之盟位列上孤豈特奮干戈  
之衛自惟晚歲獲與殊休喜抃之私敷陳罔旣

回汪相公啓

竊以門牆夙阻莫瞻華袞之尊使介俯臨荐辱珍函  
之寵退惟固陋渠敢奉承伏惟某官社稷元勳朝廷  
舊德屬上聖龍飛之日會中原雲擾之辰首定大橫  
之占克扶漢祚將啓中興之運復振周宗旣攄經濟

之謀聊遂燕間之樂收四方之能事每欲從赤松之  
游明一士之宿寃獨追恨伯仁之歿雖春秋責備於  
賢者然禮義何恤於人言過形引咎之詞彌見執謙  
之意載深紬繹倍切感銘春律寢暄琳宮多暇願精  
調於鼎食益加衛於生經

回知福州張叅政啓

伏審祗膺休命顯荅茂功陞秘殿之隆名增介藩之  
勝勢伏惟慶慰恭以某官鉅才周變厚德鎮浮入與  
政塗活國之謀具在出分戎闡干城之略益昭蓋身

自任於安危故心每關於休戚屬時逆黨挾彼疆隣  
遽涉地以深侵擬投鞭而徑渡天臨萬騎至煩鑿輅  
之親征雲集千艘卒賴樓船之爲助况委輸之狎至  
加籌策之上陳迨此班師宜先懋賞韓滉濟陝郊之  
餉絕驩動六軍常袞報閩嶠之政成寵歸三事顧嚮  
風之逾切辱流問之過勤感篆滋深名言曷旣

回李觀文啓

伏審誕膺明命茂對閑休冠書殿之班聯正台司之  
體貌丕昭異數允協具瞻伏惟驩慰恭以某官盛德

格天傑才經世凜凜公輔之望身退而道愈尊堂堂  
社稷之勲時危而節益著雖綠野遂晉公之樂而蒼  
生思謝傅之歸曾謂衆非尚膳多口日月在上風雨  
不渝塞翁之馬自還田者之牛安在坐復青氈之舊  
於我何加行歸黃閣之崇斯言可必某猥叅近列遠  
映餘輝阻修賀燕之儀驟獲烹魚之素仰慚謙眷俯  
劇悸惛感佩之私敷宣罔旣

賀孟觀文啓

伏審抗章宸極得請輔藩伏惟驩慰恭以某官亮節

端朝純誠翊世有開濟之才以戡多難有深厚之德  
以鎮群浮叅幹萬幾備更六載顧勲勞之克著宜風  
采之聳聞楚粵塵清雖已掃潢池之習關河霧塞猶  
未奠神州之居方倚老成庶圖恢復遽辭榮於右府  
暫分命於左符書殿絕班邈連霄漢蓬山傑觀近隔  
濤江想偃旆之未遑恐賜環之已下退惟孤拙夙荷  
庇庥悵會合之多乖欽出處之全美依歸徒切敷叙  
曷周

謝送生日詩狀

伏蒙都騎見存大篇爲賦曲記劬勞之日過形褒頌  
之詞伏讀嘉言敢忘重拜占斯干之吉夢愧此餘生  
誦汝墳之卒章居然永歎感銘之至敷叙曷周

回路樞密謝復職啓

伏審祇拜渥恩寵還峻職搢紳胥穆表著用光恭惟  
某官德懋儀形志先康濟歷艱難之多變恃直亮之  
一心越秉鴻樞居存勝筭辰猶克壯將枕戈以立功  
名晝接方隆忽解組而辭富貴雖綠野之居甚樂然  
蒼生之望彌深比下明綸進聯秘殿蓋謂孔殘之去



理或未宜必知季子之歸時乎有待尚阻瞻承之幸  
過蒙問勞之勤感佩茲多名言曷旣

回折樞密啓

伏審進儀帷幄叅幹樞機圖國步之救寧孰堪大任  
契上心之簡在自屬真賢郵音播傳輿論欣穆恭惟  
其官才兼文武學際天人亮節孤風名素高于當世  
深謀至計志每切於生民自頃來歸卽期登用數奉  
凝旒之對果膺虛席之求孔明之臥隆中身嘗不屈  
夷吾之在江左人以無憂必將發揮平日欲行之言

用能經營方今未畢之事衆口所必斯言不誣退省  
衰蹤久叨末契甫投閑於鄉社實託庇於門闌依鄉  
采勤輸寫難旣

轉官許回授與兄謝宰執啓

庀職無功叨被公朝之寵抗章有請願爲私室之營  
仰承出綽之恩俯慰陟岡之念兄弟感泣父老歎咨  
伏念某起家寒微涉世迂濶進踰涯分自貽滿溢之  
虞退省愆違猶負顛隳之懼至若成書之奏御固已  
乞身而去朝敢謂第名例蒙盼賞念事爲之靡稱控

懇避而莫諧爰念急難曷陳迫切雨露之澤旣霑被  
於同根雲漢之章復表揚於異數夫何僥倖有此遭  
逢茲蓋伏遇某官直道事君誠心好善性惇孝友用  
風勸於多方身任安危將日新於庶治過蒙矜惻迺  
獲褻俞方收跡於山樊第歸恩於陶冶銘鏤之至敷  
叙曷周

賀張叅政啓

伏審進膺詔綽叅幹事樞恢張遠圖將肅清於國步  
登用舊德首厭服於人心郵音播傳輿論欣穆伏惟

某官才本人傑學爲世師問望冠於三朝風采傾於四海論關休戚炳若著龜之明行蹈險夷挺然金石之操雖綠野之居甚樂而蒼生之望益深果下賜環趣覲行殿亟踐廟堂之舊倚平疆場之虞江左之見夷吾已期剋復魯人之思季子皆喜來歸諒少展於謀猷卽盡戡於禍亂書功不朽指日以須顧惟衰遲夙叨知矐念收跡江湖之上獲庇身陶冶之中抃躍私誠倍萬常品

回賀正狀

王正謹始人統開端惟時者英宜享壽祉伏惟某官  
才周庶事學富多文方茂對於春祺諒亟還於天闕  
過蒙慶問第切感銘

回趙相公啓

比者濫膺詔綍參執事樞未遑坐席之安更躡朝班  
之峻寵私沓至控微懇而弗俞憂責併加撫衰蹤而  
靡稱懼形心骨愧溢面顏伏念某出自寒家本非遠  
器干祿之學曾不足以裨身負薪之言夫豈堪於謀  
國頃緣虛獎馴致徹官久貽尸素之譏甫遂歸田之

幸聖恩未旣遽因簪履以見收愚慮已殫無復絲毫  
之云補不圖兩月而閱三遷屬當郊壘之多曷贊帷  
籌之祕深知忝曷積負兢慙此蓋伏遇某官道合天  
民才優人傑功高社稷久登翊於睿謨望重搢紳專  
統盟於善類夙借吹噓之力曲爲根柢之容遂使衰  
年復叨殊用崇墉在望尚稽感臆之陳寶翰流音亟  
辱慶緘之貺銘藏之至敷叙莫周

與浙東安撫趙相公啓

伏審某官上丞相之印辭榮廟堂分刺史之符作鎮

藩服俶開盛府誕布寬條想風采之一新知謠謠之  
四出伏惟某官忠存社稷德冠天淵出扶邦運之危  
上簡帝心之眷沛然膏澤旣得百姓之心赫爾威名  
方制四夷之命決策已定脫屣如遺之高謝於成功  
以大振於頽俗平津之開東閣翹材盡萃於一時裴  
度之守北門殊禮佇觀於它日公歸未晚人望如斯  
退省衰蹤久叨末契欽勇退之節雖遯想於高牙賦  
遄歸之詩卽首迎於華袞依鄉之切敷叙曷殫

知樞密院回前執政啓

里巷投閒方少休於疲曳巖廊圖舊俄復玷於寵休  
顧陳力之不能當試可而乃已靡容控避祇負兢慙  
某竅啓寡聞疋羸多病昨以粗糲之質進與廟堂之

游過計拳拳雖有徙薪之慮空言落落卒無橫草之  
功恐孤奉於明恩期退藏於晚歲不圖遠外猶累簡  
求惟樞機之臣職在甲兵之間未之學也豈能忘尸  
素之憂方且圖之何以濟艱危之會拊心惕若承命  
赦然伏惟某官

云

云

致是迂愚復茲忝冒時哉不可

失固欲勉於著鞭老矣無能爲誠恐貽於覆餗尚祈



告教少違譴何猶稽柔牘之修遽辱珍函之貺謙光  
所逮朽質爲榮愧感交深控陳難盡

趙相公

盛德冠時殊勲蓋世身雖勇退委萬鍾如脫屣之輕  
計或決行措四海若覆朽之固素緣知瞻嘗贊設施  
韓宣撫劉宣撫

忠貫神明功存社稷將制四夷之命共圖九廟之安  
李相公席叅政

盛德冠時傑才經世心存王室每敷納於嘉猷力挽

人材專統盟於善類曲敦交際公賜揄揚

孟留守

厚德鎮浮殊勲翊世典刑所屬暫司雀鑰之嚴體貌  
方隆將拜制麻之寵曲敦交際公賜揄揚

李尚書

直道立朝精忠許國曲敦交際之舊每借揄揚之私

沈忠敏公龜谿集卷第十終

東正交關時以作四時表文讀之則其音韻之  
與古詩無異矣此其所以為詩也

東正交關時以作四時表文讀之則其音韻之  
與古詩無異矣此其所以為詩也

東正交關時以作四時表文讀之則其音韻之  
與古詩無異矣此其所以為詩也

沈忠敏公龜谿集卷第十一

雜文

碑記 贊銘 賦 樂語 疏祝文 策題

湖州德清縣重修孔子廟碑

予少時嘗聞諸長老言吾邑初脫五季之亂入樂更生敦朴力穡未知學也大中祥符間予從祖書記始以儒學中進士甲科名稱籍甚鄉黨榮之邑之子弟遂風勸於學其後正議大夫盧公父子踵取名第翺翔要途而學者日寔以盛故有孔子廟基下制狹既

不足以揭虔妥靈而矜佩野逸弗克群處迨明道壬  
申之歲河南竇克來是邑訊之卜人以爲餘不溪來  
自天目之山注于邑之東南兩山挾之秀氣橫出宜  
益有搢紳之祥乃作今廟直巽之隅高明亢爽非復  
舊比而文雅之士班班出焉閭閻相望若應厥卜予  
結髮亦肄業其中絃誦之聲猶可想也中間朝廷興  
學而有司便事僅於舊宇丹堊而已矣然自初考卜  
迄今百有三年而墻屋頽圯草莠于唐廟貌雖存丹  
青缺落使人喟然有寧不嗣音之歎春秋祀事著于

令甲而罷幣牲牢之薦弗備弗蠲神用不享太末鄭  
如幾隱居溪陰一日過予曰吾儕儒服顧不若佛老  
之徒嚴奉其祠以侈大其師之說耻也已而率邑子  
沈良能相與告於邑令楊燄及凡境內之士大夫士  
大夫悉勸趨之爭出緡錢以佐其費乃盡徹去門廡  
更立而一新之回勢隅落雖因其故而棟楹顯敞視  
昔則又加焉爰卽兩廡析爲齋廬以待學者中嚴廣  
殿像設巍然翼翼群公繪事惟序觀者爲之屏息嗚  
呼休哉實經始於紹興癸丑之仲冬越明年春上丁

行釋奠之禮落成焉是日也予兄次律攝衣升堂談  
春秋大旨凡邑之士大夫濟濟在列咸有肅容邑令  
跽而請予文以記予謂國家遭強胡之難義士枕戈  
武略是急然未嘗斯須忘右文之事誠謂捨是則無  
以爲天下也吾邑令乃能間搶攘之餘導人所欲立  
學崇祀以夸四方是可嘉已乃爲書其本末而系之  
以詩曰

餘不之源來自天目注之兩崖其勢若束惟邑  
東南山縈水狀始建廟官茲焉考卜士也來游

文風載郁更時槍攘園蔬是鞠豈其山川秀氣  
回復厥有吾徒輸金委粟載新棟楹工靡程督  
有神司之不疾而速揭揭元聖端冕袞服群公  
從之祀事孔肅嗟我令尹崇化表俗日興自躬  
往繼前躅勉我士子荒迨則辱惟以嗣音豈惟  
干祿祥源泱泱庶來其續

披雲樓記

宣和四年春祕閣曾侯自山陽移守嘉禾嘉禾在三  
吳爲支郡封域儉狹而物產饒衍居民敦本好約雅



稱易治侯之至因其俗施教條數十示所禁勸民畏  
慕之相戒毋犯侯令越數月政成從容語僚吏曰郡  
雖小然介江湖之間水舟陸車孔道四出賓客之至  
無虛日顧其地洿下無高明之居以稱燕游不足以  
壯千里觀望盍圖之先是內相葉公道卿於子城西  
北築亭榜曰披雲後人更名樓其實亭也庫屋三楹  
歲久且圯又西北其戶下瞰通闌煙塵宛轉於几席  
間非登臨之美侯乃以完堞餘工悉徹去故屋其基  
增高倍薄取宅名材無用者更南鄉爲亭外施重檐

而中敞之深明洞達丹碧粲然亭西挾以水閣曲欄  
橫檻映帶左右它日與客登焉送天末之孤帆迎海  
上之遙岑目力所窮與空爲際更唱遞嘯觴酌流行  
神意徜徉如在塵垢外信哉披雲霧覩青天僅足以  
方其快且適也侯舉觴屬某曰茲游樂乎子爲我記  
之某以謂成壞哀樂奄忽之變在物也物不可以爲  
常顧吾所建立有不可磨滅者物則託焉以垂不朽  
此羊公所以興峴首之歎而湛輩反自哀已不暇也  
登斯亭也徘徊四顧蓋吳越交兵百戰之場而勾踐

夫差之爭雄也高城深溝有荒田野草之悲穴狐狸而伏鱗鱗也其人骨已朽而其事爲可哀也前年盜弄潢池兵傳吾城連三日夜民大震擾天子至出禁旅討平之盜去而城完因得剏亭其上一觴相屬是可樂也侯生于相家文章事業稱天下設施當有大於今日者則名之傳山川猶將託之不朽况斯亭乎故亭之成壞情之哀樂有不足言而侯之功名爲可勉也於是乎書

水陸報應記

趙丞相云頃年關中間有一士人被酒夜臥於道傍  
堆阜之上夢有人呼曰城南某人家設水陸我輩當  
乘此託生可同往堆阜之下有人歎曰一醉人臥於  
吾上出不得奈何未幾前所呼者復至曰水陸甚盛  
但不甚精潔聖賢不降不爲利益若有噓嗟之聲已  
而曰久饑粗得一飽其人復應曰饑甚雖一飽亦不  
可得是無福也且而視之堆阜乃一古墓也鬼神之事  
茫昧難知然水陸報應甚多大抵不可不精潔今  
因兒子往妙香營設此供故錄示長老佛智大師紹

興五年七月丁酉必先書

劉希顏真贊

目送孤鴻心徹寒泉風神散朗儀狀毅然掀髯一笑  
呼吸雲煙是爲宗廟之貴器自號山澤之臞僊

葛魯卿研銘

野人闕古溝猴黥石研而異之以歸於丹陽葛公公  
屬其客吳興沈某爲之銘曰緻而澤靈液之藏櫛而  
而豐瑞璞之章先生婆娑翰墨之場天授茲器殆文  
字之祥也邪

客游玄都賦

南陽公數徵不腆之文然街談巷語陶寫性情已卽  
擲去如棄唾漫不復顧省寧暇著橐刺人目耶旣數  
月公更書下餞客在門恐遂泯默則爲他日恨輒賦  
客游玄都因公懸弧之旦用以爲壽其詞曰

客有夢游玄都之官覩一公子緇衣繡裳下觀蠻觸  
之闕儼裹甲乎戰場俄而免胄四顧周章少焉休矣  
息閉影藏粵有一老長身矍然深衣而黑緣緩歌擊  
節起舞偏僂揖公子於下坐曰予方外之毳客不知

人間禮法之嚴公子之貴也抑嘗觀蜡齒於列座訪  
宴毛於廣筵莫如予年長矣公子其自言之公子曰  
嘻先生其耿予也耶予生於三江長於五湖跨瑤光  
之象負溫洛之書蓮房晨嬉著室夜娛嗟日月之幾  
何戴神屋其如初此猶未足以語壽也蓬萊岱輿負  
嶠方壺以與夫瀛洲五山之根出沒乎歸墟彼舉首  
以戴之從禹疆而遞命者實予之徒也先生以爲何  
如先生爵里奚居譜謀奚自豈周穆王之遺民抑丁  
令威之嫡嗣也不然何得渠略視予而以大老自恃

耶先生曰有是哉子壽可期可以策計若予壽者蓋  
不知其紀也一瞬目而千歲一舉足而千里鍊金氣  
於丹臺之爐導玉腴於華池之水引脰長嘯聲聞帝  
庭子夜沉沉天門未扃刷騏驎之捷步輦鸞鳳之翾  
翎縹渺碧落徘徊紫清群仙命予以九還之使持絳  
節而擁霓旌公子曾未免夫泥塗之累網罟之患豈  
足以族十五齧而友四靈者哉公子曰然則奈何先  
生曰公子中溫文而外健武能納新而吐故其亦壽  
之類也曷不捨輿潔趨爽塏以爲生之衛也予聞南



陽之墟下有菊潭公子其往游焉朝緩步而夕至也  
酌餘波之清冷擷遺芳之藿靡屬霞觴而自侑渺天  
香之泛齒插子翼乎崑丘庶幾閱少廣之終始公子  
曰唯唯覺而賦之以薦乎南陽公之壽几

燈華賦

耿宵寒之不寐兮起攬衣而踟躕無以散余之幽憂  
兮憑插架之叢書引短檠使置前兮聊縱觀以嬉娛  
注膏油續餘燼兮發雙照之清曠曷孤光之炯炯兮  
舍生意其斯須曾不根而自華兮騁便娟與扶踈初

倍齒之星懸兮葩萼爛其紛敷中鬱勃而旁分兮榮  
明滅而欲無乍掩曠而蔽虧兮辛勤余之前除悼飛  
蛾之撲緣兮猶若擷芳而採腴童子旁睨而竊笑兮  
曰此吉占奚忽諸苟禦福其不祥兮余豈廢書而改  
圖憂喜聚門唯所召兮獨何爲此華之覬覦彼九華  
之威蕤兮灼百和之淳蘇散春風之列炬兮導珠翠  
與笙竽挾光景以舒秀兮紛榮落之自如豈其規福  
而樂黜闇兮蓋以衆而函胡相風釭之一枝兮屬山  
澤之臞儒辨牛毛之瑣細兮忌鶴彩之縈紆綠桐君

之藥炮兮詫微光於隣壁之餘童子曰噫嘻吁呼已  
見背於群趨兮悲夫主人之愚余掩卷而三歎兮悼  
此言之甚迂物不可必兮神不可誣忽若太乙之下  
臨兮醮青藜以燭余余何爲感此嘉貺兮豈以夫余  
所讀者道載而與之俱儻此花之可授兮耿傳燈之  
老瞿

天寧節致語

一氣周天水行協而景風至千齡接旦火德盛而榮  
河清是開震夙之祥實顯神靈之異無疆受命有截

傾心恭惟

皇帝陛下秉錄頒常握圖建極席慶紫霄之上匹休  
黃序之前經緯萬方如家至而日見出入六合本神  
動而天隨妙用中藏全謨外發振張祖考之不績興  
起帝王之極功故得九廟延禧二儀薦祉壬辰紀運  
已驗寶符之文甲子復元遂增神筴之筭爰屬誕彌  
之節共霑燕衍之恩喜浹尊誠均封祝衍皇基於  
億載發民謳於四夷臣猥以微生逢茲昌祚莫奏克  
庭之技徒賡擊壤之音遙望天墀上陳口號

欲識樞星紀誕彌天人端命撫昌期聲函萬歲騰驩  
頌節應千秋舉慶儀金篋賜齡輝碧簡珠囊薦壽肅  
丹墀何須更效南山祝長嶽連雲自不移

館待接伴少卿樂語

屬國勤王來效貢輸之職端朝命使往宣逆勞之恩  
方仗節之遠臨宜征塗之少憇恭惟接伴某官望隆  
朝右名滿人間以師友之淵源爲文章之光焰襟懷  
磊落森森若干丈松宇韻風流濯濯如三月柳蚤動  
冕旒之邃徧躋臺閣之華公言所歸睿意彌注輟自

月卿之列授茲星使之權正行人之官雖云將幣過  
諸侯之國固許致饗知府某官喜覲儀形願聞規畫  
肆筵設席考禮度於故常鼓瑟吹笙按樂音之純繹  
儻劇厭厭之飲庶觀秩秩之容但其等猥以賤工叨  
居樂部宜有口號上瀆台顏

九重簡注輟名卿仗節東來爲遠人貢篚百年旌屬  
國使輶千里導陪臣遵塗行對三山曉開燕爭看一  
笑春無疾其驅今有詔趣歸掃橐侍嚴宸

館待高麗進奉使樂詔

八月浮槎舊識遼東之使節九天出綽新叅漠北之  
賓儀方朝廷旌守圉之勤宜邦國謹克庭之實聿遵  
彛制共樂昌期恭以進奉某官將命嚮風馳誠就日

跨萬里鯨波之險趨九重鳳闕之深爰屬經塗適當  
授館知府某官甘棠訟息茂草囹虛喜逢嘉客之臨  
特展芳筵之好調絲摩竹騰聞皦繹之音舉白飛觴  
備講獻酬之禮願盡此時之樂事留爲後日之美談  
某等猥以賤工叨陳末技幸閱從容之集宜修蕪累  
之詞仰瀆台顏敢陳口號

仙槎渺渺出鷄林路指神京歲奉琛四海已同朝禹  
志萬年宜罄祝堯心儀叅大客恩方茂位亞群公澤  
更深況有王人宣德意經塗莫惜費登臨

薛林二太尉特排樂語

旌旗炫日屬元老之相逢樽俎浮春念故鄉之孔樂  
一時榮觀千里驚傳恭惟特進太尉中書太尉道合  
真儒功存舊弼四海仰廟堂之同德九重知帷幄之  
協心鳳閣鸞臺曾記並游之盛龍韜虎帳更瞻分鎮  
之雄離合萬端猷爲一揆甫申之輔周室豈止藩宣



姚宋之相唐朝行資謀斷會有過家之便宜從授館  
之勤知府某官喜覲儀形欲親談笑茲奉千鍾之壽  
以交四座之歡樂備飲趨窮里社謳謔之勝禮行酬  
酢忘朝廷體貌之尊將紀英游永爲嘉話但某等叨  
居伶籍獲侍鈞顏不揆荒蕪敢呈口號

三吳分野直中台一日驚傳二相來桃李蹊間紛組  
綬湖山影裏炫尊壘清談道舊真難繼淺笑追歡許  
易陪須爲故人成徑醉已聞雙詔下銀臺

館待杭帥樂語

大編凌波方重西州之別高牙照路遽分南顧之憂  
共瞻元帥之啓行式壯列城之勝勢恭惟安撫某官  
宏材驚世偉望映時氣貌冲和濯濯如三月柳操修  
挺特森森若干丈松蚤繇天府之華遂陟霜臺之峻  
九重簡在四海想聞爲鈞爲衡將圖一命之袞之屏  
之翰暫臨十國之連褰帷甫屬於按行拜節益敦於  
交際知府某官方歸總制荐奉儀形况當卜夜之期  
適值班春之候金絲間作庶欲佐於清歡醴斝交飛  
亦何辭於徑醉示一時之榮觀爲百年之美談某等

猥以賤工獲陳薄技敢呈口號上瀆台顏

熊羆千騎駐南州謀帥來寬旰食憂草木也應思潤  
澤湖山正恐費遨遊旌旗眩日催前導樽俎浮春許  
甞留劇飲不須辭徑醉詔環聞已戒鳴騶

秀守館待交代樂語

旌旆留春千里聽告新之政尊壘競日四筵陪道舊  
之歡蓋雅躅之相承之所重式敦交好以鎮

群情恭惟知府某官一時吏師三代人傑學擅南豐  
之舊氣陵北固之高見襟懷之磊落撥煩

剽劇出談笑之從容政成暮月之間名在重霄之上  
解組去郡行艫造朝寄傲風流徒發南樓之興論思  
密勿將陪西掖之遊知府某官契重金蘭情均膠漆  
不改袁公之約束欲追召父之歌謠樂備餽趨願奉  
千鍾之壽禮行酬酢期存百世之盟儻投轄以忘歸  
庶盍簪而徑醉但某等叨居佞籍獲侍台堦不揆荒  
蕪敢呈口號

一麾相望繼芳塵召杜風流主與賓芸閣去方思就  
日竹符來及趁班春清談款密看論舊善政從容許

告新早晚銀臺雙詔下其期持橐侍嚴宸

代天寧功德疏

有王者興既協生商之命使聖人壽咸罄祝堯之心  
惟是假於靈文茲用申於善頌

皇帝陛下伏願永膺帝祚誕保皇圖衍周詩多子之  
祥享箕疇五福之證歸謳歌於四裔率土底寧卜歷  
數於萬年後天難老

乾龍節開啓疏

十四月紀帝堯之生慶鍾是日三萬歲頌遂人之壽

喜浹斯民仰扣覺雄式祈睿筭

淵聖皇帝伏念降年有永受福無彊孔子之居九夷  
適丁厄運穆王之馭八駿亟返畏途載臨誕聖之辰  
彌罄歸君之祝

乾龍節滿散䟽

舜風解愠適四月維夏之期商馭發祥契千齡復旦  
之運式祈睿筭宜藉勝緣

淵聖皇帝陛下伏願多難而興大德以壽天旋寶仗  
百六之會亟平歲奉瑀觴億萬之年永固

天申節開啓疏

帝眷命而生商允符長發之慶民謳吟而思漢光啓  
中興之圖敢仗真乘仰祈睿筭

皇帝陛下伏願降年有永受福無彊亟還天邑之居  
端享法官之御神民萬物同臻開泰之期壽富多男  
金協延鴻之祝

進天申節功德疏

多難啓聖共占震夙之祥一德格天自獲龐鴻之祉  
表微臣之善祝集淨侶於嘉辰庶藉真乘式增睿筭

皇帝陛下配天覆幬象日照臨一清戎輅之行盡平  
僭亂大正法宮之御永享壽康

泗州傳衣塔祈雨疏

比歲告饑民方罹於艱食常賜爲沴天復降於疾威念  
吏道之興妖致農工之失職被躬省咎雪涕祈哀仗  
大士之悲憐憫群生之危阽慈雲廣布法雨周施霑  
然嘉澤之流戢此驕陽之熾庶令老弱旋見豐登

昊天殿祈雨疏二首

瞻彼甫田蔚然多稼行遂九秋之望尚愆一雨之期



惟是高原亦既亢旱冀昊穹之昭格俾時澤之周流  
降此康年恃之卒歲

荐饑之後艱食是憂望嗣歲之豐登脫斯民之流殍  
而常賜爲沴時雨久愆麥齊壟而復萎禾入土而隨  
槁三農危懼百吏倉皇唯仗籲辜之誠可瀆蓋高之  
聽伏望垂慈下土徧敕群神令出風雷大霑雨師之  
澤候分雲漢亟收旱魃之威尚幸時之小康用拯民  
之大命

三清殿神霄殿祈雨疏

運在金穰已屬豐年之望時方火老爰申亢旱之憂  
乃聞高原既泣枯穗仗霄晨之不佑幹陰陽之至權  
雲上於天用敷剛健之德月離于畢終至滂沱之祥  
佛寺祈雨疏

豐年已兆嘉澤尚愆雖蒙一雨之濡未厭三農之望  
敢憑精意叅扣覺慈冀法澍之周施抑驕陽於已熾  
滋我多稼溢于大田

代修武烈帝廟疏

遺像森嚴示無忘於馨烈叢祠圯陋懼弗稱於明威

比祈保障之恩嘗致繕完之懇昭茲肸鬻曉以穰祥  
初旣協於象占已乃形於夢告終蒙靈貺遂成屏盜  
之功載省初誠敢費鳩工之事眷惟此郡實其故鄉  
嘉與永懷之流樂輸崇飾之費

奉迎嘉山龍井水祝文

矯矯神龍惟水爲所吹噓成雲噴薄成雨惟茲井泉  
爲龍所王一勺之多澤徧九土挈此瓶罌置我庭宇  
燁燁電壺坎坎雷鼓發揚英靈浹洽周溥漑我田疇  
滋我稷黍毋使我民仍歲饑阻則惟報之如御田祖

金山廟祈雨祝文

秀居湖海原隰之間厥壤斥鹵三農於水無所蓄藏  
故雨涉旬則病水不雨涉月則病旱水旱之禱不容  
不瀆春夏之交千里龜坼嘗歷懇於爾神神實憫之  
賜以甘霖守無以荅揚神之休德既上其事請加封  
崇今者不雨亦旣無旬多稼向萎通渠就涸居民行  
商皆以病告守不忍避瀆神其嘯召風雲雨我邦域  
採此沴氣卒爲豐年守亦俾民承事益謹謹告

太學秋試策題

古之所貴於骨韋之臣何也人臣剛正有守尚氣節  
敢諫諍國勢恃之以強猶骨強四支也官之奇懦而  
不能強諫隣國知其必可假道汲黯戇而好諫叛國  
畏之至於寢謀國勢強弱從可知矣然而君子處心  
積慮欲人之無過而已指人之過而正救之自敵以  
下有不能堪不幸人主有過舉犯顏色觸忌諱干不  
測之誅以數批逆鱗豈得已哉古之君子願爲良臣  
不願爲忠臣抑有以也不得已而有言言行善歸吾  
君福在天下可也其言不行去其位可也去其位亦

非君子之本心猶日望之庶幾其改也事不求可功  
不求成悻悻然訐而賣直徒使人君有拒諫之名而  
無補於國宜君子之所不取古之人善納諫者莫如  
唐太宗善進諫者莫如魏鄭公史稱太宗見爲嫵媚  
則鄭公豈好訐哉是以諫行言聽君臣俱榮衆君子  
學史舊矣求古諫諍之臣拳拳愛君直而不訐可以  
爲後世法者試件其人以告若夫克位不言曰吾惡  
爲訐如陽城等輩又非君子之所欲聞也

召試館職策題二首

東南實古吳越百粵之地號爲富強自春秋以來略  
可考也隋唐都於陝洛歲資邦國之用多在東南委  
輸常過天下之半其人主上遭時多故治兵東南恭

勤節儉出於聖性之自然故凡冗費悉從蠲罷唯以  
養兵爲急然而公私力屈日以更甚其故何哉異時  
財賦粟帛之出於東南者猶可件數也今有司坐失  
經常之入每以乏告顧獨取之民民愁無聊得爲便  
乎豈理財者無其術耶抑取之涓涓洩之浩浩有不  
勝理者歟理財曰義孔子之言也雖然理財亦多術

矣商鞅力本務農之說與管仲等也劉晏抑商賈而籠天下之貨與桑洪羊等也李巽之徒其術又下於晏而後世論者予管仲而黜商鞅予劉晏李巽而黜桑洪羊豈用之或異耶今議者欲舉理財之政以革東南一切之弊鮮不流爲數子之刻心計之失必以病民姑舍是而求合先王理財之義以揀今日軍興之急宜必有說焉願條其要以備上之採擇

自古撥亂之主未有如周宣王者而詩之所稱在車攻則曰內修政事外攘夷狄在豸民則曰任賢使能



周室中興夫唯政事既修矣而又分別賢能而任使之故能攘夷狄復境土紹文武之絕業而致中興也  
國家遭中微之運夷狄內侵蓋八年于茲矣 主

上聖神英武自足以運動六合儻因天意人心之歸  
恢復中原不爲難事然猶勵精圖治虛已用人兢兢  
焉日不遑暇仰惟聖慮必以上策自治莫先於政事  
人才之間故耶夫政事之在天下可則因否則革不  
可膠也揆之於時措之宜尚有可施行者歟叅之於  
救弊扶偏之說尚有可更張者歟賢能並用濟濟在

列然臨事有乏才之歎其或濟時之才隱而未用尚  
有可以博蒐訪而廣儲養者歟凡此皆當今之切務  
而中興之功恃以成者今發策以試三館之士將為  
時用非直取其空言而已願條其利害之實悉著于  
篇以觀所蘊

擬書御試策題

朕德菲陋紹承大統遭家多難求濟未獲是以博延  
豪俊咸造在庭覬聞治道之要于大夫其必盡精極  
慮樂為朕言之蓋聞在昔聖王之治天下正心誠意

躬行乎上者固自有道而措諸事業之間則或寬或  
猛或質或文變通隨時不膠於迹故其成效布在方  
冊昭昭乎其可觀也朕甚慕之越自卽位九年于此  
矣愚欲雪父兄之耻而復 祖宗之烈夙夜祗懼罔  
敢荒寧而施爲繆盪治效缺然深惟其故不憚改作  
間者乃下銓量之令以擇吏而真才猶未顯也嚴科  
歛之禁以恤民而實惠猶未孚也謹簡練之法以治  
兵而冗食猶未革也夫吏道未肅民力未蘇兵勢未  
強朕之治所以未效也顧何以輯事功弭禍亂哉而

建議之臣并欲考課以核殿最省官以抑奉稍力役  
不足以供餉饋也爲之屯戍管田以寬之賦入不足  
以給調度也爲之平準均輸以佐之爵賞未艾也爲  
之定武功之等紀律未明也爲之叅府衛之制凡若  
此者其合於古便於今乎其或有不然者耶雖然此  
治之迹也上之欲三辰明四時序災沴不生而動植  
遂性下之欲風化行習俗厚姦宄不作而中外協心  
茲可以占天人之助矣夫何敵不克何難不濟興復  
大業其庶幾乎子大夫以爲何修何營而可以臻此



沈忠敏公龜谿集卷第十二

行狀

墓誌銘

祭文

青詞

定書

朝請大夫盛公行狀

曾祖得中故不仕祖卞故任漳州兵馬監押累贈右  
千牛衛大將軍父僑故任左朝奉大夫直集賢院知  
越州累贈朝議大夫公諱允升字德常其先餘杭人  
公之四世祖蟠仕錢氏爵位通顯錢氏舉國內附遂  
徙建德至集賢公宦游吳興樂其山水因家焉公資

稟端亮自少小屏絕嬉弄力學問道古今屹然如成人稍長喜爲文辭采贍蔚一時賢士大夫咸稱其能元豐間

神宗皇帝闢上庠以經術造天下士公挾其藝往試率占上游流輩多所降屈已而更元祐尚聲律公自度雕琢之學雅非所好去之不復問三年

哲宗皇帝親郊詔五品皆得官其子遂以集賢公蔭補太廟齋郎調開封府酸棗縣主簿未赴會集賢公捐舍館護喪歸葬潤州卽廬次哀毀癯然杖乃能起

卒喪尉潤之金壇哀弗忘也秩滿奉太夫人還居吳興屬歲饑盜斥境內州將病之先是烏程尉闕正員檄公攝領且語之盜公分曹督捕擇所脅從縱使緣畝而執其渠首械送州一境帖然州上其事司勳以格進官一等丞蘇之崑山縣崇寧元年官制行授登仕郎公之丞於崑山也事有便於民無巨細輒舉之其非所便不問久近必去乃已代有期傾邑詣州泣留公再任州不能奪請于朝時上方建鄉校復里選欲得能臣倚以辦事有旨從之邑舊有先聖廟庠



屋纔數楹公承詔一切更徹根椽寸甍不斂於民而落成先於諸郡部使者才之聯牘言上三年召至闕改宣德郎簽判杭州未幾代回攝開封府司刑曹事尹辟公真命且下公獨念太夫人春秋高不樂北宦勾還舊職是時東平呂公惠卿帥杭被旨釋才吏訪境內逸跡備修九域圖志杭於東南爲大詮次居多帥難其人比公至喜曰吾事辦矣卽一以屬公公搜抉無遺事數月書成奏御遷通直郎通判揚州大觀二年上躬受八寶恩遷奉議郎往歲淮甸小歉

春秋二租及官所貸緡錢在民者詔悉閣之而強家  
大姓寅緣爲姦其非所應閣者詭免甚衆歲且豐猶  
抵之不以給上事公具簿最勾稽得實諭使償凡爲  
錢數十萬以佐外計遷朝奉郎太夫人壽且九十矣  
念歲時姻族燕游之適在官下心未嘗一日忘吳興  
公惕然曰吾始以親故仕今所居非親所好惟食萬  
錢誼不忍卽解印鞞致其事以歸左右就養惟謹居  
無何太夫人以壽終公執喪如集賢公時益不懈政  
和二年當路以公年未艾才不宜遂休表復用訓詞

七  
卷之十一  
三  
褒許卽以舊領階官司開封府戶曹事方朝廷攷正  
徵角二聲庶燕樂以釐革鄭衛淫哇之習公上所著  
樂書數萬言論辨古樂所以析用中正之法甚悉

上嘉用之改儀曹兼大成府製造官三年司勳奏公  
曩攝邑蘇之常熟捕獲盜鑄金錢法應賞由是累遷  
朝請郎九月燕樂成 上命輔臣覆視唯公所製精

妙一時特恩遷朝奉大夫踰月賜服三品皆異數也  
四年營奉 明達皇后寢園與有勞遷朝散大夫

俄得請知秀州五年公猶待次鄉郡以大晟奏功還

朝請大夫一日忽語所親曰始吾乞身強健自謂終老里門渠意及此今而歸架足以侈上恩可但已耶因復請休於家理別圃茗雪之上幅巾藜杖往來其間澹乎若與世無營者閱秘典日數百紙要以了達歿生人亦初未之知也居數月感疾命諸子具祕器卜壽藏既乃曰後事豫矣瞑目何憾卽折簡素所從游告以逝日至日終于正寢治命不亂其悟解乃如此實政和六年閏正月十八日也公雅有策畫臨事不爲苟且之計所至績效藹然有聞於時故所遷官

率繇懋賞獨於榮利恬靜比再挂冠年猶未衰南州  
士大夫高其行愛慕在色使公徜徉以進則其所施  
設何如哉享年五十有八娶孫氏封宜人子男六人

曰康迪功郎婺州兵曹掾曰茂迪功郎坊州司刑曹  
事曰庚庠庶序皆游鄉校爲儒生女七人長適登仕  
郎朱德延次適迪功郎錢均次適貢士陳琦次適貢  
士吳景信次適太學博士錢圻餘尚幼孫男一人女  
二人明年三月十四日諸孤奉公之柩葬于烏程縣  
九元鄉金蓋山之原先所卜也某與公實同里而公

之子度疏其治行屬於不腆之文且曰將求名世道  
德君子銘焉以圖不朽謹叙次于右端謹狀

朱夫人墓誌銘

夫人朱氏世爲湖州安吉人父繹太廟齋郎自其曾  
高以來號以貲雄於鄉然儒服蟬聯素風甚飭夫人  
幼而莊靜整整有家法父母愛之爲擇良配得同里  
潘侯師仲歸焉夫人之歸逮事其姑能先意順適卒  
以孝婦稱於族黨之間事其夫恭謹如待遇嚴賓客  
娣姒雍穆怡怡如也潘侯少小喜自振拔其交游多

四方才士大夫館穀如歸至傾家不問絲竹之娛帷  
帳豆觴之具必極情腆夫人職之也歸十年生三男  
子曰芑曰莘曰蕢潘侯卒時夫人盛年既終喪宜改  
適夫人聞之慟絕自誓弗許然二子甫勝衣其季在  
襁褓未能誰何也夫人克奉潘氏祀字其孤有幽閒  
淑<sub>御</sub>之操三子既稍長知事夫人一日斥奩中物幾  
所於庭悲泣不自勝呼三子侍旁且誨之曰汝父平  
生時鏗意欲立門戶非苟然者不幸棄諸孤蚤世吾  
衰亡撫存雖鞠窮不悔吾心固有處也今汝曹齒宜

學其以詩書起家成汝父志顧何以籠金爲其爲汝  
資勉之哉三子相持泣謹諾卽招聘四方知名士館  
之門下授以儒術如誓云三子資秀發疑然可喜也  
爲學務自刻苦在儕類中嶄嶄見頭角蕢遂一舉中  
乙科授廸功郎調高郵軍司兵曹事迎夫人之官下  
會芑及莘由鄉薦肄太學夫人旦暮念之不衰蕢乃  
奉安輿西游上都以娛其意旣至而蕢小疾不起夫  
人以客柩歸卜居郡之西闔曰吾不忘故里顧吾廬  
蕢兒時戲劇及其起居寢飯處歷歷在眼中吾不忍



眎也汝曹脫有立庶幾釋吾此哀不然無以吾歸二  
子奉夫人訓相戒語激昂益不懈客有相過夫人從  
屏間闚之其人賢卽色喜語謀而意嫚輒禁切不相  
還往故所與游多益者亡幾何莘亦相次中第授廸  
功郎調衢州西安縣尉歸拜夫人於堂下夫人疾已  
侵攝衣強起一眎之歎曰吾嫠居三十年天卒相吾  
二子俱成名芭故未偶度其趣操宜不墜厥家吾歿  
何憾夫人疇昔嗜內典因索其書日誦之彌月忽若  
有得默然冥坐瞑目而逝其了達死生雖學佛之徒

自以弗逮實建炎戊申十二月十九日也享年五十  
有三有孫男七人曰梅曰楫曰楹曰格曰權曰相孫  
女三人皆幼越明年九月某日諸孤奉夫人之喪歸  
葬於邑之東山鳳亭之岡將葬諸孤載夫人語泣請  
銘於予予謂人爲善患不力誠力未有無其報者夫  
人志節終始凜凜乎不可奪烈丈夫有媿焉身見二  
子躡取名第起爲搢紳家天之相其爲善獲報豐矣  
鍾黼之祿顧不能一朝享之殆其賦予然耶茲亦可  
悲也已三子少從予游且夫人行應銘義不得辭乃

爲之銘曰

其殖也豐而用之冲不羸其躬其節也正而持  
之定不隕其姓此古列婦之所難而夫人能然  
得不爲賢也耶是宜神者報之用錫爾祉迄成  
厥家克昌厥嗣鳴鳳之岡喬木蒼蒼銘詩孔昭  
百世之藏

黃直閣墓誌銘

祕閣黃君子虛歿旣葬諸孤喪服更造予跣以泣曰  
先君子葬未克銘治命以屬公不肖孤其忍廢先君

子之命敢碣墓以請予與君雅故且諸孤請益急則  
諾而銘之君諱策子虛其字也其先居建之浦城爲  
望族世有徹官自大父游姑蘇樂其土俗因家焉今  
爲姑蘇人曾大父浹累贈奉議郎大父挺仕承議郎  
累贈金紫光祿大夫父彥仕朝奉大夫君性豪邁風  
神峻拔方童壯時出語已驚人弱冠一舉進士中乙  
科追和梁昭明所選詩持見眉山蘇公公期之曰異  
時必以文顯初選授杭州司理叅軍折獄精明吏屏  
息不敢弄以事秩滿授開封府雍丘縣主簿元符末

詔許中外言事是時

昭慈聖獻皇后既復位號而

典冊有未盡正者君上書引古義爭之言劇剴切藉

藉聞指紳薦者以君才磊落不宜浮沉簿領改授齊

州州學教諭會崇寧黨錮之論起故老名臣鮮克免

者君亦坐前所上書刻名黨石羈置登州二年徙海

州既而上皇感寤斥用事大臣破黨論仆其石立

碎之君例還姑蘇休官自號隨緣居士閉戶讀書益

自刻苦爲文章瓌詞老氣絡繹間起至其甚得意視

古作者無媿也佳時勝日相羊山水間賦詩自娛澹

乎若與世無營如是二十年故禮部侍郎鄒公浩諫  
議大夫劉公安世右司員外郎陳公瓘皆以敢諫爭  
名重當世君從之游上下其議論相厚善宣和中姑  
蘇守賈諲知君名強欲使之辟致莫下諸君勢人意  
君可撼以祿爭爲出力推輓齟齬不合去爲浙西提  
舉司幹辦公事移京東改發運司主管文字君亦未  
嘗薄其官所居稱治 上卽位之二年改宣教郎通  
判嚴州明年召對 行在所又明年 上追錄黨人  
除直祕閣其在嚴州數以爭可否忤部使者意使者

嫉之誣劾君縱獄事按驗無所得卒奪一官左受宣  
義郎罷去退而築室五湖之旁日閱浮屠氏書要以  
刮去世故捐愛憎然其了達乃於歿生之際脫然如  
去來忽一旦起盥櫛呼諸子侍前曰吾其脫於斯乎  
而輩行自力毋墜吾訓語訖危坐而逝實紹興二年  
八月十有二日也享年六十有三娶程氏生三男曰  
維曰纓曰縱皆以儒業世其家一女適從事郎胡總  
君作壽冢於靈巖之麓手植之木拱矣諸孫卽以其  
年十月十日舉君之柩葬焉從其卜也先是君得元

符詞臣手疏載 上皇聖訓備言 昭慈之復位號

乃 欽聖追用 泰陵悔意驚且喜曰天也使 泰

陵之意自於天下死不恨亟上之君既歿始用昭慈  
戚屬信安郡王忠厚奏請詔以其疏付史官示萬世  
嗚呼君才百於人而不一試惻惻然爲國納忠雖擯  
斥流落以終其身不少悔其亦可哀也已有文集百  
二十卷藏于家銘曰

山盤盤兮松桂蕭森川渺渺兮魚龍嘯吟顧瞻  
中丘兮窈其幽深曰惟哲人之藏兮抱器陸沉



訊來世兮誰其賞音

祭張提舉太碩人文

毓賢名家作配令族脫略華腴蘋藻惟肅洎喪所天  
守義彌篤有子九齡出入顧復訖爲純臣慈訓所屬  
天實報之終享遐福累命重封金葩鈿軸壽介期頤  
隆養畢足詔起使華于此苦服敦匠事嚴不遠鄉曲  
歸耐佳城森然拱木吉路啓行哀榮其族躬致奠觴  
寓茲一哭

祭陳述古墓文

孔子之生也嘗所休止猶惡其木陰迨其歿也戒毋  
翦伐乃愛及乎孔林陳蔡之郊一飽莫續而塊然堆  
阜奉祀百世以迄乎今公於孔子之道聞而習之於  
數千載之後曷其能固結於人心生有顯位足以行  
其道術歿有遺愛足以流其德音公之歿久矣而此  
邦之人所不能忘者顧典刑之具在想精爽之如臨  
像公儀形旣修祠事而歲祭墓下猶庶幾其來歆俯  
視宿草仰瞻拱木翁然而深茂者蓋樵牧知戒而無  
斤斧之侵况若某等推公餘澤以旣學者則永懷之

之龜筮集十二  
極宜不能自禁一酌而招此故事也九原可作尚鑒  
時忱

祭馮中書文

嗚呼公乎才蓋一世高文大冊爛乎星斗之陳崇論  
闕議沛乎江河之逝朝廷倚之屹然如山有不可奪  
之節搢紳望之凜乎如霜有不可犯之氣是故奮臂  
布衣曾不一紀而徑趨直步已正乎廟堂之位常人  
視之亦既達矣公所自視猶病乎未試方將跨喬松  
之年埒伊周之美胡不憇遺爲國龜筮乃厭人間脫

然而號嗚呼天故生公宜必有意其奪之遽亦復何  
謂蓋上比乎列星增光芒於舍次公之儀形無復望  
見而其竹帛之勲河山之誓則昭乎數十百世引此  
一觴文以侑哀公乎不來何以止此盈襟之老淚

爲侍從官祭中書張侍郎文

天生異材其必有意待時而爲驗若符契公起布衣  
以文自藝逮事 上皇更踐中外治賦北垂錢流於  
地頻歲宿師民罔告匱靖康之初盜用出疆堂堂魏  
都謀帥不良城保弗竭襲盜以狂公願指揮萬旅在

有羅拜叩頭戒無披猖謂公活我卒制一方真人龍  
翔神噐有歸公來自北謀疾抵龜賜履省戶正冠殿  
帷直聲流聞上嚴憚之三接不又集于鳳池孰能恤  
國如恤其私意誠則固言直則危匪言之難無難不  
爲口如其心無有隱欺庶幾百年宏濟無疑梁木其  
壞天不憖遺計音告外道路垂洩矧我在列心言是  
依同舟濟川公其楫維今也云亡胡寧不悲公騎星  
辰櫂槍掩輝一觴以訣尚其昭茲

爲侍從官祭郭樞密文

嗚呼豪傑之士終克有爲而其所施則有疾遲有端  
有緒與時爲宜年不待期天或嗇之如大山川龍蛇  
所戲利澤發見物無不滋功用不究則誰測知公之  
所有閔汗瑰奇目無全牛矧曰割鷄奏刀發劓蘭陵  
是基動無留行名聲日馳惟時 上皇用公於微

延見燕間左右論思宵人好欺公見其幾一麾而去  
無有磷淄明明天子躬履艱危思見異人甚於渴饑  
返公于南付之樞機公曰天子雄武英威如漢高帝  
光武之資民散未收兵驕未治曷寧中區曷靖外夷

我惟大臣寤興在斯惟旣厥心協謀同辭輔成上志  
無俾闕遺乃詢仇方尺筮以筮譬彼壞屋隨顛而支  
三年有成必濟登茲天胡不仁而遽奪之上爲盡傷  
股肱其虧嗚呼我官于朝日瞻羽儀曾未浹旬歿生  
乖睽撫念疇昔失聲歔歔江風蕭蕭丹旄飛飛引觴  
告訣聊寫我悲

祭劉資政文

嗚呼古風弗還士有異轍氣吞九州或略於細行心  
畏四鄰或虧於大節公所自期則無玷缺太山喬松

礪礪截薛萬木歲寒獨傲霜雪公在布衣聲滿橋門  
諍臣之篇蔚有名言仕而克踐惟恐有聞人所甚難  
公處不煩絳帳幃帷出入師儒豸冠峩峩屹立天衢  
曰婉變者匪予之徒迄自奉常遂躋禁途惟是靖康  
國勢岌岌邊遽日奔胡來益急肉食者鄙私忿角立  
公抗論之去位而泣 真人御極還公於朝貳卿常  
伯恩榮孔昭公發忠言不替夙宵南昌之禍匪公之  
招天子有命一洗公寃意將復公以掖至尊炎方瘴  
毒灰生乖分喪來自南莫返忠魂嗚呼哀哉惟昔文



正搢紳之師公實希之極力以追立朝之節此心庶  
幾強恕求仁化及惇發我從公游垂二十年公一見  
我推挽後先我豈忘公平生之言百年莫贖尚可忍  
論何以奠之生芻一束侑以斯文失聲慟哭嗚呼哀  
哉尚饗

焚黃祭文二首

維年月日嗣子沈某謹以清酌庶羞之奠敢昭告于  
先考承事之靈某不孝蒙先人遺訓得官于朝弗  
洎之悲號天罔極  
今天子有事於明堂霑澤四

海厥有贈典追賁埏塗恭致時羞以燔綸告惟先人  
其克享此休寵用庇子孫瞻望松楸不勝永慕嗚呼  
哀哉尚饗

嗚呼哀哉昊天不仁早奪吾母蓼莪之感曾莫報於  
劬勞濡露之悲空永懷於怵惕

今天子禮成宗

祀澤霈九泉錫號䟽榮載于綸告庶幾可慰罔極之  
思慈顏如臨其克享此休寵用庇子孫

權殯告淑人范氏文

嗚呼哀哉君歸我家十有九年我仕不偶半世迍邐

鞠窮閔凶奉我周旋克相內事見謂爲賢比我叨榮  
遭時多艱心期安平白首相歡別我經旬歸歛君魂  
空閨無人誰與話言嗚呼哀哉弱子稚女號呼徹天  
失此慈母誰拊誰憐顧瞻山林上云未安今舉君棺  
槨葬祇園牛衣之泣尚何可論長號永訣失聲煩冤  
嗚呼哀哉尚饗

安葬亡妻范氏祭文

嗚呼自君之逝既閱初祥窀穸未安夙夕靡忘爰得  
吉卜大壯之陽與我先壟喬木相望將舉君柩茲焉

永藏引觴告訣言出涕滂嗚呼哀哉尚饗

焚黃祭文

曾祖太子太保 曾祖母同安郡夫人方氏

祖太師 祖母魏國夫人孫氏

某蒙祖宗遺德獲以儒學致身于朝與聞政事厥有

褒典及我曾祖一再錫命而至宮保

曾祖妣云及我  
曾祖妣一再錫

命疏封大邦祖云及我先祖申錫寵命位極公  
師祖母云及我祖妣申錫寵命遂開全魏之封

贊書

具存謹燔以告伏惟英靈昭茲垂福于後尚饗

先考太子太師 先妣濟陽郡夫人丁氏

某不孝被服慈訓夙夜兢兢罔敢墜失獲以儒學致  
身于朝與聞政事厥有褒典及我先人申錫寵命至  
于官師先妣云及我先妣申錫寵命疏封大邦贊書具存敢燔以告嗚  
呼弗洎之悲昊天罔極尚其昭鑒垂福後人尚饗

通義郡夫人

某蒙天子恩睠致位于朝與聞政事厥有褒典錫君  
大郡之封茲亦榮矣贊書具存謹燔以告嗚呼糲食  
布衣同我艱苦榮不逮生胡寧不悲尚其鑒之服此  
休寵尚饗

追薦亡妻淑人范氏設醮青詞

魂氣無不之用返歸於真宅道術無不在示濟拔於  
堦塗輒罄哀誠仰干洪造伏念臣亡妻淑人范氏比  
嬰微疾忽隕盛年日御遄移霞衣永闕一生艱苦之  
狀何忍回思 罪垢之因須憑追悼是用祇延羽  
服光啓蘭場演三洞之道言營九壇之法事哀集勝  
利洗滌宿愆長夜冥冥冀脫幽關之趣圓虛渺渺願  
陪仙路之遊更錫羨於私門普承休於妙蔭

生日設醮祈福青詞

列宿昭回分直受生之次層霄縹渺密持司命之權  
敢露危衷仰干洪造伏念臣性資蒙昧家世伶俜偶  
奮跡於寒鄉驟登名於膺仕雖福輕乎羽全緊覆護  
之恩然德輶如毛每懷顛覆之慮頃悼亡於私室俄  
去位於公朝終戒滿盈遂投閑散尚懼身旣湛於世  
俗行或負於神明動積愆尤居亡解謝適會劬勞之  
日肅事禴禳之科恭款琳官具宣藻笈薦蘋蘩之品  
庶存貴質之儀陳蠲蟻之誠必達蓋高之聽精純感  
格肸鬻顧臨整雲旆之逶迤開天門之眇蕩正直是

與願盡滌於百非壽考且寧期永綏於五福

定親書二首

藉甚名門託高明之可援蔑然賤息懷伉儷之是求  
諒事契之相重許姻聯之復締其第二子青衿業墮  
道學未優伏承賢女小娘子彤管訓嚴德音甚美恭  
馳五兩之幣願結二姓之歡鳴鳳鏘鏘想發占於永  
世天桃灼灼期見詠於宜家

為葉內翰撰

烏衣群從嘗陪再世之游丹桂諸郎雅重同年之好  
儻緣夙契復締華姻伏承令孫女柔惠慈祥德音甚



茂而某姪孫某稚駮朴鄙道學未優屬當伉儷之求  
宜託高明之援恭馳信幣願結歡盟

為長男

回定書二首

宦學從游雅有潘揚之睦昏姻合好願交秦晉之歡  
伏承令郎某官名第相先人門俱勝而某第幾女笄  
儀甫就壺則未閑豈圖葑菲之求適遂松蘿之託相  
攸甚樂敢無告於良媒卜世其昌將有依於令族  
奉承祧之祀宜得名家稽合姓之文猥從衰裔豈攀  
援之敢爾亦氣類之適然伏承令弟先輩種學已優

秀發桂林之上而某姪孫女肄儀猶簡迨及桃華之  
初旣諧卜世之昌克遂相攸之樂將歸令族敢告良  
媒

沈忠敏公龜谿集卷第十二終



跋

宋史本傳稱與求歷御史三院知無不言前後幾四百奏其言切直自敵己已下有不能堪者余心慕之及觀是集所列表奏劄子無非辭謝除授之文無一涉及軍國重事者蓋生平著述散落殆盡其孫誥所哀輯僅此而已是爲明萬曆刊本遇完字注欽廟諱構造穀等字注光堯御名嫌名慎字注御名瑋字注御舊諱其涉及宋帝詞句均提行空格此爲宋刻原式蓋猶從淳熙刊本出也吾友劉翰怡以舊鈔本梓行曾據明本覆核校訂精詳而几塵風葉間或不免卷四賜劉光世韓世忠張浚詔是本浚作俊蓋二張實爲兩人同官於朝當建炎初苗傅劉正彥之亂戡定者爲張俊與韓劉二將而運籌帷幄者則爲張浚宋史張俊傳等兵敗開門以出世忠俊光世入城見於內殿



龜谿集校勘記

卷次

葉次

行次

本書

劉刻本

李序

一

前二

被遇

遇作題

後一

才大夫士游居郡

夫作貢居作歷

邑者

後六

召還仍爲天官

召誤有仍誤都

二

前二

後六十年

六作亦

前五

安能無槩然也

槩作慨

目錄

十一

前四

注

以限江南北者

北誤比

十六

後五

張俊

俊誤浚

十七

前二

張俊

俊誤浚

二十一

前三

莫仲珪

珪下有自代狀三字

一 五 後八 了知二物不相關 了作可

後九 風月膏梁兼者少 梁作梁以下數見同

二 一 前七 名御 勿亡酒德 亡作忘

二 六 前二 停鞭且知阿香車 知作□知字實誤

七 前六 四郊屏尾開新瀆 開作聞疑是開字

九 後四 官游莫謾嗟流落 官作宦

十五 後五 繫舡來伴白鷗眠 舡作船

三 二 前一 詩饑元只在清眸 清作青

十四 前八 更須判劇飲 判作拚

後八 更看末上傳春信 末作陌

十七 後一 收隨芋栗供山谷 芋作芋

二十 前一 不使高材陪鼎鼐 材作才

前五 空使諸生記典刑 刑作型

前八 四朝者舊推先達 達作輩

後六 楊子雖生輒美新 楊作揚

二一 前七 義烈崢嶸照國史 照作昭

後九 會有雙飛鶴戾天 戾作唳

四 二 前二 益勵壯猶 猶作猷

十二 前一 此乃國家大計 家下有之字

十四 前九 張俊 俊誤浚

五 一 後七 張俊 俊誤浚

十二 前四 架積超踰之愧 架作深

六 四 後八 圖功乘事幾之會 幾作機

八 前七 方日俟於謹何 何作訶以下數見同



九 前二 毫峻

毫作髦案毫似豪之

六 前八

訛

訛

十一 前五

更深據蒺之思

深作勝

十二 後七

協贊宸謀

謀作謨

十三 前八

稷禹

禹誤禹

十四 後二

亟自臺端而躡進

自作置

十五 前六

未替大恩

替作報案替似替之

十六 前六

訛

十七 後六

仍迤邐起發

無仍字

十八 前二

糜殞

殞作捐

十九 後三

勅令

令作命

二十 前一

扳援

扳作攀

前七

則過於厚矣

無於字

九 後七

樞密院事劄子

無事字

十一 後九

赴院供職者

奪者字

十二 後三

仗元戎之節

仗誤伏

十四 後二

長恨一涯之隔

恨作悵

十六 後三

第勤三賀之私

私作思

十六 後七

干部使者之譽

干誤千

二十一 前三

填撫四夷

填作鎮

二十二 後六

救寧四方

救作綏案救爲救之

二十三 後九

洪鈞

誤

九 後九

洪鈞

洪作鴻

六 前四

榆枋

枋誤枋

七 後五 已寬□暮之懷

□作遲

八 前七 儒宮正席

宮作官

十二 後五 歎齋鹽於朝暮

齋誤齋

十 十九 前六 惟樞機之臣

惟上有□

十一 三一 後五 盍圖之

盍下有卽字

十四 後六 並協延鴻之祝

並作益

十九 前二 桑洪羊

洪作弘

十二 十四 前七 不替夙宵

替作替

後八 弗□泊之悲

弗泊接連不空格

十五 後五 稟葬祇園

祇作祇

後八 夙夕靡忘

夕作夜

十七 前五 祇延羽服

祇作祇羽作□

前六 九壇

壇誤耘

前九 青祠

祠作詞

後八 必達蓋高之聽

必誤心

後九 整雲旆之透迤

透迤誤透迹

十九 前二 旣諧卜世之昌

諧誤借

